

FENNINANNDE

¹ Feñjinannde Iisaa Almasiihu on. Ndee feñjinannde ko Allaahu on halfini nde Iisaa Almasiihu on, fii yo o hollu jiyaabe makko ben kon ko saatii arude ko booyaa. Kanko kadi o banginiri d'un nulugol malaa'ikaajo makko goo e oo jiyaado makko Yuuhanna, ² seeditiido ko o yi'i kon fow, d'un ko daaluyee Alla on, wondude e seeditoore Iisaa Almasiihu on. ³ Maloore wonanii on jangudo e ben hediiibe dii kongudi ndee feñjinannde, maanditii koo ko windii, ko fii saa'i on badike.

Salminaango Yuuhanna haa e Mofte den Aazii

⁴ Immorde e min Yuuhanna haa e mon onon dee *mofte Iisaa jeedidi wond'e ngal diiwal *Aazii:

Yo buttu e moyyere wonan on immorde e on Woodaado, on Woodanoodo e on Aroyoowo, wondude e dii ruuhuji jeedidi wondi ka yeeso jullere laamu makko, ⁵ wondude kadi e Iisaa Almasiihu on, on Seedeego Sella-Findeejo, e Adaado immintineede e hakkunde maybe bena, d'un ko oo Lando lambe aduna.

Yo on Yidsudo en, fuutiniri en yiiyan mun fan bawgal junuubaaji men, ⁶ wadfi en laamateeri e *yottinoobe sadaka ka Allab, on Baabaajo makko, ko on mangu e laamu wonani haa poomaa. Aamiina!

a **1:5** 1.5 Zab. 89.28 b **1:6** 1.6 Egg. 19.6

⁷ E hino ka o arata, himo arda e duule^c, kala neddo yi'ay mo, hay tufunoobe mo ben.^d Awa kadi bolondaaji aduna on fow fesay sabu makko. Ko non woniri. Aamiina.

⁸ Allaahu Joomiraado on daali: «Ko min woni Halfeere aranere nden e sakkitorde nden, d'un ko Woodaado on e Woodanoodo on e Aroyoowo on, on Jom Bawgal.»

Fii no Yuuhanna Fenjiniranaa fii Almasiihu on

⁹ Ko min Yuuhanna oo musiddo mon, tawdaado e mon e tampere e laamateeri e njanjaare e nder humondiral e Iisaa, hari mido e ndee suriire wi'eteende Patmuusa, sabu yottingol an daaluyee Alla on e seeditagol an fii Iisaa.

¹⁰ Nalaande Joomiraado on,^d tawi *Ruuhu Seniido on no tippii e an, mi nani hawa tiiduka baawo an wa hito *liital, ¹¹ no wi'a: «Ko yi'ufaa woo windu e deftere, nabanaa d'un mofte jeedidi wonde den e dee ca'e Efesi e Simirna e Pergaama e Saayatiira e Sardiisa e Filadelfii e Laa'udiisa.»

¹² Onsay mi yeeyitii fii ndaarugol on wond'o lan wowlande, mi yi'i joddfinirde pitilli tafiraade kanje jeedidi. ¹³ Tawi wa'udo wa *Bii-Aaden no hakkunde den joddfinirde pitilli, borniido kaf-taane juutudo, haabitii dattol kanje ka bernde, ¹⁴ tawi hoore makko nden no rawniri wa leebi baalii maa wa cuddi, gite makko d'en no wa'ita wa joyngol yiite, ¹⁵ koyde d'en no wa'i wa siladane wondo e nder beembal yiite, hito makko

^c 1:7 1.7a Dan. 7.13 ^d 1:7 1.7b Zak. 12.10 ^d 1:10 1.10
«Nalaande Joomiraado on» ko alattiire nden.

ngon no wa'iti wa hito jurnde ndiyan. ¹⁶ Tawi koode jeedidi no ka jungo makko jaamo, kaafa welka ka mbelde didi no yalta ka hunduko makko. Awa kadi yeeso makko ngon no wa'ita wa nde naange jalbi tuma nge hatti e wulude.

¹⁷ Bay mi yi'ii mo, mi yaniri ka ley koyde makko wa maydo. Onsay o fawi jungo makko jaamo ngon e hoore an, o wi'i: «Wota a hulu. Ko min woni Arano on e Sakkitoro on, ¹⁸ awa kadi ko min woni Wuurudo on. Hari mi maayii, e hino mido wuuri haa poomaa, awa kadi mido jogii saabijje mayde e jahannama ñen.»

¹⁹ O wi'immi kadi: «Awa jooni windu ko yi'udaa kon e ko fewndii kon e ko faandii arude kon. ²⁰ Awa koode jeedidi ñen ka jungo an jaamo, e jodðinirde pitilli tafiraade kanjne jeedidi ñen, e hino ko ñun firi kon: koode den jeedidi ko malaa'ikaabe mofte ñen jeedidi, awa jodðinirde pitilli ñen jeedidi, ko mofte ñen jeedidi.»

2

Batakuru Windanaandu Moftal wongal Efeesi ngal

¹ «Windan malaa'ikaajo moftal wongal Efeesi ngal, wi'aa:

«E hino ko on tambiido koode ñen jeedidi ka jungo mun jaamo, on jindoowo e hakkunde jodðinirde pitilli tafiraade kanjne ñen jeedidi wi'i moftal ngal kon:

² «Mido andi kuude maa ñen e yangi maa kin e ñajñaare maa nden. Mido andi kadi a jabataa

mujnanaade bonbe ben, awa kadi a ndarndike waditiibe sahaabaabe ben, hara hinaa be dñun, tawdaa ko be fenoobe. ³ Hida ñajnjii, tampi sabu innde an nden, kono a haabaali.

⁴ «Kono mido felu-maa huunde wootere: ko ko seludaa giggol ngol yidsunodaa mi aranun ngol kon. ⁵ Anditu ka iwudaa dñon yanudaa! Tuubaa, ruttodaa e golleeji maa arani din. Si hinaa dñun, mi artoyay e maa, mi sottinane jodfinirde pitilli maa nden ka nde woni dñon, si hinaa hara a tuubu, ruttidaa. ⁶ Kono e hino ko mi weltani-maa fii mun kon: ko ko ajudaa dee kuude bee jokkuge laawol Nikola, de mi aji min kadi.

⁷ «Mo no mari nowru, yo jento ko Ruuhu Allaahu on woni wowlande mofte ñen kon. On fooludo, mi newnanay mo naamugol bïbïe ngal leggal ngurndan wongal ka aljanna Allaahu on.»

Batakuru Windanaandu Moftal wongal Simirna ngal

⁸ «Windan kadi malaa'ikaajo moftal wongal Simirna ngal, wi'aa:

«E hino ko on Wondo Arano e Sakkitoro, on maynoodo wuuriti, wi'i moftal ngal kon:

⁹ «Mido andi tampere nde tampudaa nden e miskinankaaku maa ngun, hara-le ko a galo. Awa kadi mido andi hoyre nde bee wi'itiibe *Yahuudiyankeebé, hara hinaa be dñun, wonumaa hoynude nden, hara ben ko be moftal Ibuliisa. ¹⁰ Wota a hulu ko faandidaa tampude kon. Awa Ibuliisa no faandii bugaade wobbe e mon ka kasoo fii no ndarndore dñon. On hebay ton tampere e nder balde sappo. Kono gomdin

haa maayaa, d'un mi yedete *meetelol ngurndan ngol.

¹¹ «Mo no mari nowru, yo jento ko Ruuhu Allaahu on woni wowlande mofte ñen kon. Kala fooludo, mayde ñimmere ñden hewtoyttaa mo few.» »

Batakuru Windanaandu Moftal wongal Pergaama ngal

¹² «Windan kadi malaa'ikaajo moftal wongal Pergaama ngal, wi'aa:

«E hino ko Jogiido kaafa welka ka mbelde ñidi kan wi'i moftal ngal kon:

¹³ «Mido andi ka hodufaa ñon, ko ñon jullere Ibuliisa ñden woni. Hida jogitii innde an ñden, awa kadi a hayfinaali ko gomdfindaa mi kon, hay ñande oo seeditantoodo lan sella-findeejo, wi'eteedo Antipaasu, waraa ka mon, d'un ko e ñdee wonunde Ibuliisa.

¹⁴ «Kono no woodi ton ko mettimmi e maa. Hida mari ton yimbe jogitiibe jannde Bal'ama ñden, on jannunoodo oo wi'eteedo Balaka fegginirgol *Banii-Isra'iila'en nammaingol be tebbeeli sakkanaadi sanamuji, jokkina be jinnaa. ¹⁵ Wano non an kadi, hida mari jogitiibe jannde jokkubé laawol Nikola ben. ¹⁶ Awa tuubu, si hinaa d'un, mido ara e maa ko neebaa, mi habira be kaafa hunduko an kon.

¹⁷ «Mo no mari nowru, yo jento ko Ruuhu Allaahu on woni wowlande mofte ñen kon. Fooludo on, mi neeminay mo «*manna»^e suudiido, mi yeda mo kadi hayre raneere, hara

no windii e nden hayre innde heyre nde hay
gooto andaa si wonaa on hendiido nde.» »

Batakuru Windanaandu Moftal wongal Saayatiira ngal

¹⁸ «Windan kadi malaa'ikaajo moftal wongal Saayatiira ngal, wi'aa:

«E hino ko *Biddoo Alla on, on mo gite mun wa'i wa joyngol yiite, koyde mun wa'i wa sila-dane wi'i moftal ngal kon:

¹⁹ «Mido andi kuude maa ñen e giggol maa ngol e gomdinal maa ngal e golle maa ñen e ñajanjaare maa nden. Awa kadi mido andi kuude maa sakkitore ñen no buri arane ñen ñuuðude.

²⁰ «Kono feloore nde mi jogani-maa nden, ko ko accudaa oo debbo wi'eteedo Yeezabeela, wi'itiido ko annabaajo, janni faljini kurkaadi an ñin kon fii yo be jokku jinaa, be jaama tebbeeli sakkanaadi sanamuji. ²¹ Mi okkii mo saa'i fii no o tuubira, kono o faalaaka tuubude on jinaa makko. ²² E hino mido wallinirde mo tampere tiisunde, kanko e be o jinidaynood ben, si hinaa taw hara be tuubu ñen kuude mabbe. ²³ E hoore ñun, mi waray iwtirbe baawo makko ben, ñun mofte ñen fow anday ko min woni lipoowo miijooji e lipoowo berde, awa kadi mi yobay mo kala e mon njoddi kuude mun.

²⁴ «Kono onon bee be Saayatiira heddiibe, be jokkaali nden jannde fenandeere, onon be andaali ko wobbe wi'ata ko gundooji luggudi Ibuliisa kon, mi alaa fawude on dongal goo, ²⁵ si wonaa yo on tamu ko jogidon kon satta haa nde mi aroyi.

²⁶⁻²⁸ «Kala fooludo, nentini kuude an den haa ka rawnoode, mi okkay mo bawgal wano min kadi mi hendornoo non e juude Ben an, o laamoo e hoore ley yi din, o aynira di labbooru njandi, hara ndun munciray di wa payande leydi, mi jonna mo kadi jaawiire subaka nden.^f

²⁹ «Mo no mari nowru, yo jento ko Ruuhu Allaahu on woni wowlande mofte den kon.» »

3

Batakuru Windanaandu Moftal wongal Sardiisa ngal

¹ «Windan kadi malaa'ikaajo moftal wongal Sardiisa ngal, wi'aa:

«E hino ko Jogiido ruuhuji Alla din jeedidi e koode den jeedidi wi'i moftal ngal kon:

«Mido andi kuude maa den, mido andi kadi no wi'aa ko a wuurufo, kono ko a mayso.

² Finu, tiidinaa ko heddi kon, dun ko ko faandii maayude kon, sabu mi yiiraali kuude maa den wa timmude yeeso Alla an on. ³ Anditu no nanirdaa Kibaaru Moyyo on non, e no hendordaa mo non. Doftodaa mo, tuubaa! Si a finaali, mi arday wa ngujjo, awa kadi a andataa ko e saa'i hombo mi arata, mi juhe.

⁴ «Kono hida mari yimbe seedaabe Sardiisa don, be tuuninaali conci mun din. Be yaaday e an, hara hibe bornii daneeji, ko fi hibe handi e dfun. ⁵ Ko wano non kadi, fooludo on ko conci daneeji bornoytoo, awa kadi mi montoytaa innde makko nden ka deftere ngurndan. E hoore dfun,

f **2:26-28** 2.26-28 Zab. 2.9

mi qirritoyto innde makko nden yeeso Ben an e yeeso malaa'ikaabe mun ben.

⁶ «Mo no mari nowru, yo jento ko Ruuhu Allaahu on woni wowlande mofte den kon.» »

*Batakuru Windanandu Moftal wongal
Filadelfii ngal*

⁷ «Windan kadi malaa'ikaajo moftal wongal Filadelfii ngal, wi'aa:

«E hino ko *Seniido on daalani moftal ngal kon, dfun ko on Goongaajo, jogiido saabi Daawuuda on, on mo tawata ko o udditi kon, hay gooto waawataa sokude, e ko o soki kon, hay gooto waawataa udditude:

⁸ «Mido andi kuude maa den. Awa e hino, mi wadii baafal udditiingal yeeso maa, ngal hay gooto waawataa ombude. A softike daalol an ngol, a yeddaali innde an nden, wonaa fii kala a duudaa fiira. ⁹ Awa mi addante bee yimbe moftal Ibuliisa, wi'itiibe Yahuudiyankeebé, hara be fenay, hinaa be dfun. Mi adday be haa ka ley koyde maa, be jiccoo, be anda wonde mido yidu-maa. ¹⁰ Bay a huutorii ḥajjaare nde mi yamir-maa nden, min kadi mi dandoyte ndee tampere faandiinde arude e hoore aduna on fow fii ndarndagol hoofube ka aduna ben. ¹¹ Mido ara ko neebaa. Tamu fota ko jogisaa kon fii wota hay gooto yettu *meetelol maa ngol.

¹² «Kala fooluso, mi waday mo doosal ka suudu Alla an on, hara o yaltataa dson hande kadi. Mi winday innde Alla an on e hoore makko, e innde saare Alla an on, dfun ko saare *Yerusalaam heyre iwroore e Alla, tippoo iwrude ka kammu,

mi winda kadi innde an heyre nden e hoore makko.

¹³ «Mo no mari nowru, yo jento ko Ruuhu Allaahu on woni wowlande mofte den kon.» »

*Batakuru Windanaandu Moftal wongal
Laa'udiisa ngal*

¹⁴ «Windan kadi malaa'ikaajo moftal wongal Laa'udiisa ngal, wi'aa:

«E hino ko wi'eteedo Aamiina on, on seedeejo sella-findeejo goongaajo, dfun-le ko on wondo bundu tageefo Alla ngon, wi'i moftal ngal kon:

¹⁵ «Mid'o andi kuude maa den, a wulaa, a buubaa. Sago an ko yo a wonu wuludo maa buubudo. ¹⁶ Ko dfun wadfi, bay hinaa a hay huunde e dfun, a wulaa, a buubaa, mi tuutirte hunduko an kon. ¹⁷ Hida wi'itii galo, aldfuso, mo ñakkiraaka hay huunde, hara-le a andaa ko a tampudo, yurmudo, baaso, bundo, holdfo. ¹⁸ Min mi waajike ma soodugol kanje labbiniraade yiite e juude an fii no laatoraa galo, soodaa kadi conci daneeji ko bornodaa e juude an fii wota hersa kolngal maa ngalg feenu, e lekki ko wujaa ka gite maa fii no yi'iraa.

¹⁹ «Kala ñen be mi yidi, mi felay be, mi wurta. Awa jooni wakkilo, tuubaa. ²⁰ Awa e hino lan, mido darii ka takko baafal, mido hodfaade. Kala on nanudo hawa an kan, udditi baafal mun, mi naatay ka ontigi, mi jaamida e makko, ontigi kadi jaamida e an.

²¹ «Kala fooluso, mi yedsay mo joododugol e an ka jullere an laamu, wano min kadi mi fooliri

non, mi joododi e Ben an ka jullere makko laamu.

²² «Mo no mari nowru, yo jento ko Ruuhu Allaahu on woni wowlande mofte den kon.» »

4

Fii Jullere Laamu Allaahu on

¹ Bawto d'un mi yi'i dambugal no udditii ka kammu. Hawa ka mi adinoo nanude kan, d'un ko hawa wa'itayka wa hawa *liital, ka wi'immi: «Yawu doo, mi holle ko saatii aroyde kon onsay.» ² Tun Ruuhu Allaahu on tippii e an. Onsay mi yi'i jullere laamu ka kammu, tawi goddo no joodii e nden jullere. ³ On Joodiido d'on no jalbiri wa hayre hittunde wi'eteende yasbe e hayre goo kadi no wi'ee sardiire. Tawi yaroowol ndiyan jalbirngol wa hayre hittunde goo wi'eteende zumuruudu no hundunoo nden jullere. ⁴ Tawi kadi julle laamu noogay e nay no hundunoo nden jullere laamu, awa kadi mawbe noogay e nayo, borniibe daneeji, taarube *meetelli kañje, no joodinoo e majje. ⁵ Tawi mayande no yalta e nden jullere laamu, wondude e digge e parnitte. Tawi kadi lampuuji jeedidi hubbudi no yeeso nden jullere laamu, din-le ko ruuhuji Alla din jeedidi. ⁶ Tawi ko wa'i wa baharu laabirdo wa biini, jalbiri wa jaaman, no yeeso nden jullere laamu.

Tawi tagooje nay wuuruđe, mari gite yeeso e baawo, no taarii, hunditi nden jullere laamu.

⁷ Tagoore aranere nden no wa'i wa ngayuuri, dimmere nden no wa'i wa kalaldi nagge, yeeso tammere nden no wa'i wa yeeso aaden, nayabere

nden no wa'i wa simbirre wiiraynde. ⁸ Nde kala e d'en tagooje nay wuurude no mari gabitanji jeegoo marudi gite nder e baawo. Jemma e nalorma de alaa tayindirde wi'ugol:

«Seniido*, Seniido, Seniido,
 ko Alla Joomiraado Jom Bawgal on,
 dun ko on Woodaado
 e on Woodanoodo
 e on Aroyoowo.»^h

⁹ Nde dee tagooje nay wuurude mawnini, ted-dini, jarni on Joodiido e nden jullere laamu woo, d'un ko on Wuurudo haa poomaa, ¹⁰ onsay ben mawbe noogay e nayo kadi jiccoo yeeso on Joodiido e nden jullere laamu, be sujana on Wuurudo haa poomaa, be liba kadi meetelli maabbe din yeeso nden jullere laamu, hara hibe wi'a:

¹¹ «Yaa an Joomiraado Alla amen,
 hida handi e darja e teddungal e mbawdi,
 ko fii ko an tagi kala huunde.

Awa kadi ko e faale maa d'un fow tagiraa,
 woodaa.»

5

Fii Deftere Taggaande nden e Baalun kun

¹ Bawto d'un mi yi'i kadi on Joodiido ka jullere laamu no jogii ka jungo mun jaamo deftere windaande nder e baawo, taggaa, notiraa tobbe kaane jeedidi. ² Tun mi yi'i malaa'ikaajo tiifudo no ewnoo ko tiidi, wi'a: «Ko hombo handi e hoabitugol dee notande ndee deftere taggaande, uddita nde?» ³ Tawi waawuso nde udditude

^h **4:8** 4.8 Isa. 6.2-3, Haz. 1.18 e 10.12

ndaara alaa ka kammu, alaa ka hoore leydi maa ka nder leydi. ⁴ Onsay mi wulli fota, bay tawii hay gooto handaa e udditugol nden deftere taggaande, hinaa fere ndaara nde. ⁵ Onsay godso e ben mawbe wonnoobe don wi'immi: «Wota a wullu. Awa e hino Ngayuuri bolondaa *Yahuuda ndin, dñun ko Geeyol Daawuuda ngol, foolii haa waawii hobbitude notande ñen jeedidi, uddita deftere taggaande nden.

⁶ Ontuma mi yi'i *Baalun wa'itaykun wa waraakun, no darii hakkunde nden jullere laamu e tagooje nay wuuruude ñen e mawbe ben. Tawi hikun mari galaadsi jeedidi e gite jeedidi, tawi ko ñfin woni ruuhuji jeedidi di Allaahu on immini e leydi ndin fow. ⁷ Kun Baalun ari, hendii nden deftere wonde ka jungo naamo on Joodiido ka jullere laamu. ⁸ Bay Baalun kun hendike deftere nden, ñen tagooje nay wuuruude e mawbe ñen noogay e nayo ari jiccii yeeso kun Baalun. Tawi mo kala e ben no jogii hoddu, e pelette kañje heewude urngallooji, ñi tawata ko torndeeji gomdinbe ben. ⁹ Hibe beytoraynoo beytol kesol, wi'a:

«Hida handi e hendagol ndee deftere,
hobbita notande mayre den,
ko fii a waranooma.

Awa kadi ko yiiyan maa ñsan sottirandaa Alla
yimbe jeyaabe e kala bolondaa
e kala haala e kala jamaa e kala lejol.

¹⁰ A wadii ñe laamateeri e *yottinoobe sadaka
fii kurkanagol Alla men on,
awa ben laamoto ka aduna.»

11 Bawto d'un mi nani hawa malaa'ikaabe duudube, mi yi'i kadi hibe hunditi jullere laamu nden e tagooje wuurude den e mawbe ben, tawi duudeendi mabbe ndin ko dente de guluuje guluuje. **12** Tawi ben no ewnoo ko tiidi, wi'a:

«Kun Baalun waraakun

no handi e hebugol bawgal

e ngalu e faamu e doole

e teddungal e darja e mantoore.»

13 Onsay mi nani kala ko tagaa, ko woni ka kammu e ka hoore leydi e ka nder leydi e ka baharu, e tagu ngun fow, no wi'a:

«Mantoore e teddungal e mangu e bawgal
yo wonan on Joodiido ka jullere laamu,
e Baalun kun, haa poomaa!»

14 Tawi tagooje nay wuurude den no wi'a:
«Aamiina!» Onsay tawi mawbe ben kadi no jicctonoo, sujja.

6

Fii Hobbitugol Notande den

1 Onsay mi yi'i Baalun kun no hobbita wonnde e den notande jeedidi. Mi nani wonnde e den tagooje nay wuurude no wowlira wa hawa farnitere, wi'a: «Aru!» **2** Mi ndaari, mi tawi e hino puccu ranewu. Tawi waddinoodo ngu on no jogii laajal, o jonnaa *meetelol, o yaari wa fooloowo e fii foolugol.

3 Bay kun hobbitii notannde dimmere nden, mi nani tagoore dimmere wuurunde nden no wi'a: «Aru!» **4** Don kadi puccu goo yalti, tawi hingu wojjiri wa yiite. Waddinoodo ngu on hendii bawgal ittugol buttu ngun ka hoore leydi

fii no yimbe ben warindirira. O jonnaa kaafa njana.

⁵ Bay Baalun kun hobbitii notannde tammere nden, mi nani tagoore tammere w提醒runde nden no wi'a: «Aru!» Mi ndaari, mi tawi e hino puccu balewu. Tawi waddinoodo ngu on no jogii balansi i ka jungo mun. ⁶ Mi nani ko wa'itata wa hawa iwruka e hakkunde den tagooje nay w提醒rude, no wi'a: «Sariyaare wootere ngawri ko *dinaruuru wooturu, awa kadi sariyaare tati muutiri ko dinaruuru wooturu, kono nebban dan e njaram dan wota a bonnu!»

⁷ Bay kun hobbitii notannde naya bere nden, mi nani hawa tagoore naya bere w提醒runde nden no wi'a: «Aru!» ⁸ Mi ndaari, mi tawi e hino puccu fultiingu. Waddinoodo ngu on no wi'ee Mayde, tawi jahannama no jokki mo. Be jonnaa bawgal e hoore peccun naya bun kun ka leydi fii mulirgol yimbe ben kaafa e heege e nabbeeli e kulle buruure den ka leydi.

⁹ Bay kun hobbitii notannde jowa bere nden, mi yi'i ka ley *layyorde wonkiji waranoobe ben sabu humagol mabbe e daaluyee Alla on e seeditoore nde be wadi nden. ¹⁰ Tawi hid i ewnotonoo ko tiidi, wi'a: «Yaa an Joomiraado *Seniido, Goongaajo, e hara ko haa honde tuma nennnotodaa jaawugol hodube ka aduna ben, yottanoo yiiyan amen dan?» ¹¹ Mo kala e mabbe jonnaa dolokke daneejo, be wi'aa yo be fowto kadi e nder saa'ihun, haa tuma adadu gollidoobe

i ^{6:5} 6.5 «Balansi» no wi'ee kadi «sikeeli» maa «peesirdfun».

e mabbe ben e musibbe mabbe warioyteebe wa mabbe ben timmi.

¹² Onsay mi yi'i Baalun kun no hoßbita notande jeegabere nden. Dimbannde leydi tiifunde wadi, naange ngen bawliri wa bagi sacciraado leebi baleeji, lewru ndun fow kadi wa'i wa yiiyan. ¹³ Tawi koode ñen ka kammu no saamude ka leydi, wa kuraaje wonde saamude nde hendlu tiifundu dimbi kurahi. ¹⁴ Tawi kammu ngun no dira taggora wa gatal, awa kadi pelle ñen e suriije ñen fow dirti ka wonnoo ñon. ¹⁵ Lambe aduna ben e teddube ben e hooreebe suufaabe ben e aldube ben e dolnube ben e jiyaabe ben fow e rimbe ben no suudoyii ka pammeeje e ka lombi pete pelle, ¹⁶ e hoore hibe wi'a pelle den e pete ñen: «Yanee e hoore amen, suudon men gite oo Joodiido ka jullere laamu e tikkere Baalun kun! ¹⁷ Ko fii nalaande mawnde tikkere maßbe nden arii, e ko hombo waawata nde dartaade?»

7

Adadu Maandinaabe ben

¹ Bawto ñun mi yi'i malaa'ikaabe nayo no darii e cobbuli leydi ndin nay, hibe jogitii keneeli cende aduna on nay fii wota hendlu wifu e hoore leydi ndin e ka hoore baharu e hoore leggal woo kadi. ² Onsay mi yi'i kadi malaa'ikaajo goo no iwra ka funnaange, himo wondi e maande Alla Wuurudo on. O ewnii ko tiidi ben malaa'ikaabe nayo, yedfanoobe wadfugol bone ka leydi e ka baharu, o wi'i: ³ «Wota on meemu leydi ndin e baharu on e ledse ñen, haa men wadfa maande ka tiide kurkaadi Alla men on.» ⁴ Awa kadi mi

nani adadu maandinaabe ñen. Ko be guluuje teemedere e cappande nayo e nayo e nder bolondaaji *Banii-Isra'iila'en ñen fow:

⁵ Ka bolondaa Yahuuda, ko be guluuje sappoo e dido maandinaa,
 ka bolondaa Ruubaynu, ko be guluuje sappoo e dido,
 ka bolondaa Gaada, ko be guluuje sappoo e dido,
⁶ ka bolondaa Asiira, ko be guluuje sappoo e dido,
 ka bolondaa Naftali, ko be guluuje sappoo e dido,
 ka bolondaa Manasse, ko be guluuje sappoo e dido,
⁷ ka bolondaa Sim'uunu, ko be guluuje sappoo e dido,
 ka bolondaa Lewi, ko be guluuje sappoo e dido,
 ka bolondaa Yassaakara, ko be guluuje sappoo e dido,
⁸ ka bolondaa Zabuluunu, ko be guluuje sappoo e dido,
 ka bolondaa Yuusufu, ko be guluuje sappoo e dido,
 ka bolondaa Buniyamiinu kadi, maandinaabe ñen ko be guluuje sappoo e dido.

Fii Jamaa Moolanaado on

⁹ Bawto ñun mi ndaari, mi tawi e hino jamaa moolanaado, mo hay gooto waawataa limude, mo leyyi din fow, mo bolondaaji ñin fow, mo jamaaji din fow e mo haalaaji din fow, no darii yeeso jullere laamu nden e yeeso Baalun kun. Hibe bornii conci daneeji, hibe jogii baape tugi ka juude maÑbe, ¹⁰ hibe ewnoo ko tiidi, wi'a:
 «Kisiyee on ko e Alla men on iwri,

on Joodsiido ka jullere laamu,
e *Baalun kun!»

¹¹ Tawi kadi malaa'ikaabe ben fow no darii hunditi jullere laamu nden e mawbe ben e tagooje nay wuurude d'en, hibe jiccotonoo yeeso jullere laamu nden, be sujjana Alla ¹² e hoore hibe wi'a:

«Aamiina!

Mantoore e mangu e faamu e jaaroore
e teddungal e bawgal e doole,

ko Alla men on wonani haa poomaa. Aamiina!»

¹³ Onsay goddo e mawbe ben yetti haala kan, wi'immi: «Ko hombe woni bee borniibe conci daneeji, e ko honto be iwi?»

¹⁴ Mi jaabii mo, mi wi'i: «Koohoojo an, an hida andi.»

Onsay o wi'immi: «Ko ben woni iwbe e satteende mawnde nden, be wuppii conci maßbe dfin, be rawnini d'i ka yiyan Baalun kun. ¹⁵ Ko dun wadi si:

Hibe ka yeeso jullere laamu Alla,
hibe rewa mo jemma e palorma ka suudu makko.

Joodsiido on ka jullere laamu d'uwiray^j be suudu mun ndun.

¹⁶ Be weeletaake hande kadi,
be dondetakaake hande kadi,
naange ngen hewtataa be hande kadi,
nguleendi woo kadi hewtataa be.

¹⁷ Ko fii Baalun wonkun kun ka tumbo jullere laamu ornay be,
ardoo be ka bulli ndiyan ngurndan d'an,

j ^{7:15} 7.15 Maa: «d'uhiray».

awa kadi Alla fittay kala gondi wondi ka gite maßbe.»

8

Fii Hobbitugol Notannde Jeedidabere nden

¹ Bay Baalun kun hobbitii notannde jeedidabere nden, deeyannde wadi ka kammu wa feccere saa'i. ² Mi yi'i malaa'ikaabe njeedido, dariibe yeeso Alla ben, no jonnee *liite jeedidi. ³ Malaa'ikaajo goo ari, woni ka *layyorde, tawi himo jogii tindohun sunnirkun urngallooji tafiraakun kanjne. O jonnaa urngallooji buy fii sakkodugol di e torndeeji gomdinbe ben fow ka layyorde tafiraande kanjne wonde yeeso jullere laamu nden. ⁴ Curki urngallooji din wondude e torndeeji gomdinbe ben yenti e juudse malaa'ikaajo on yeeso Alla. ⁵ Malaa'ikaajo on yetti tindohun sunnirkun urngallooji kun, hebbini kun yiite layyorde nden, o bugii ka hoore leydi. Parnitte wadi, e digge e mayande e dimbannde leydi.

Fii Wuttande Liite Arane den Jeegoo

⁶ Malaa'ikaabe njeedido, joginoobe liite den jeedidi, hebulanii wuttugol de. ⁷ Arano on wutti liital mun ngal. Marmalle e yiite jillunge yiyan wadi, bugaa ka leydi. Peccun tammun leydi ndin e peccun tammun ledde den sumi, hudo hecco kon fow sumi.

⁸ Malaa'ikaajo dímmo on kadi wutti liital mun ngal. Ko nanditata e fello moolanaango hußbungo bugaa ka baharu. Feccere tammere baharu on wonti yiyan, ⁹ feccere tammere ko

tagaa ko wuuri ka nder baharu kon muli, feccere tammere e laade d'en lancii.

¹⁰ Malaa'ikaajo tammo on kadi wutti liital mun ngal. Hoodere moolanaande hubbirnde wa jowlol iwi ka kammu, yani e feccere tammere maaje d'en e bulli ndiyan din. ¹¹ Tawi innde nden hoodere ko Afsantiina.^k Feccere tammere di'e d'en waylili, wonti ko haadsi. Yimbe buy maayiri sabu d'an ndiyan haadusan.

¹² Malaa'ikaajo nayaabo on kadi wutti liital mun ngal. Feccere tammere naange ngen piyaa, wonderdude e feccere tammere lewru ndun e feccere tammere koode d'en, fii no feccere tammere din ndayguuji nibbitira, e no feccere tammere jalbeendi jallal ngal mutira, jemma on kadi wano non.

¹³ Mi ndaari, tawi simbirre no wiira ka weeyo dow. Mi nani hinde wi'a e hawa tiifuka: «Bone, bone, bone wonanii hodube ka aduna ñen sabu hito deya liite de malaa'ikaabe ñen tato faandii wuttude!»

9

¹ Malaa'ikaajo njowabo on kadi wutti *liital mun ngal. Mi yi'i hoodere no iwi ka kammu, yani ka leydi. Nde jonnaa saabiwal *gaygii ngin alaa kattudi ngin. ² Nde udditi gaygii ngin alaa kattudi ngin, yalti ka nder gaygii ton curki, wa curki beembal yiite moolanaangal. Naange ngen e yaasi on nibbitiri sabu curki ngin gaygii. ³ Immorde e kin curki, kanuuji yalti ka leydi, di jonnaa bawgal sifa bawgal jahe d'en ka leydi.

^k **8:11** 8.11 «Afsantiina» no firi «ko haadsi».

⁴ Di wi'aa, wota di meemu kudol woo ka leydi e kala ko heccidi e kala leggal, kono ko yimbe be alaa maande Alla nden ka tiide mun tun di meemata. ⁵ Kono di yamiraa wota di waru be, kono yo di tampin be e nder lebbi jowi, tawi tampere ko di wadaynood kon ko wa tampere yaare si fidii goddo. ⁶ E nder dsen balde don, yimbe ben dabbay mayde nden, kono be yi'ataa nde few. Be suboto mayde, kono mayde nden doga be wodditoo.

⁷ Din kanuuji no nandita e pucci eltaadfi fii hare. Tawi no ka ko'e majji ko nanditata e *meetelli kanjne, geece majji on no nandita e geece nedfanke. ⁸ Hidi mariri sukundu wa debbo, niiye majji on kadi no nandita e niiye ngayuuje. ⁹ Tawi hiwitordi berde majji on no wa'i wa bedi njandi, e hitooji gabitanji majji on kadi no nandita e hito *giri-giriije de pucci duududi poodata, no dogana hare. ¹⁰ Tawi bukki majji on no mari ndompe wa de jahe dsen, tawi bawgal ko di tampiniraynood yimbe ben kon e nder lebbi jowi ko ka bukki majji woni. ¹¹ Tawi ko wonani di lando ko malaa'ikaajo gaygii ngin alaa kattudi ngin, mo tawata innde mun e haala Yahuudiyanke ko «Abaduuna», m innde makko nden kadi e haala Gereekiyanke ko «Apoliyan».n

¹² Bone arano on feyyii, awa boneeji didi no arude bawto d'un.

¹³ Malaa'ikaajo jeegabo on kadi wutti liital mun ngal, mi nani hawa no iwa e cobbi nay *layyorde tafiraande kanjne wonde nden yeeso Alla, ¹⁴ no

m **9:11** 9.11 «Abaduuna» no firi «mulugol». n **9:11** 9.11 «Apoliyan» no firi «muloowo».

wi'a malaa'ikaajo njeegabø joginoodø liital ngal:
 «Firtu malaa'ikaabe nayo habbaabe ka maayo
 njano Furaatiwol ben!» ¹⁵ Ben malaa'ikaabe
 nayo, hebulaninoobe fii on saa'i e nden jalaande
 e ndun lewru e nden hitaande, firtaa, fii warugol
 feccere tammere e yimbe ben. ¹⁶ Mi nani adadu
 waddinoobe pucci fii hare ben ko be guluje
 noogayo laabi guluje sappo. ¹⁷ E hino no mi
 yi'iri non pucci din e waddinoobe di ben e nder
 feñjinanne nden: tawi waddinoobe di ben
 no jogii hiwitordø berde wojjirayde wa yiite,
 mbulorde wa baka e wa'itayde wa nete. Tawi
 ko'e pucci din no nandita e ko'e ngayuuje, yiite
 e curki e mbollan yiite no yalta ka kundule
 majji. ¹⁸ Peccun tammun e yimbe ben warira
 dii albala'uji doo tati, dfun ko koo ko yaltata ka
 kundule majji, dun ko yiite ngen e curki kin e
 mbollan yiite dan. ¹⁹ Ko fii bawgal pucci din ko
 ka kundule majji e ka bukki majji woni. Bukki
 majji on no nandita e bolle, hidfi mari ko'e ko di
 wadira bone.

²⁰ Yimbe heddingoobe be wariraaka din al
 bal'a'uji ronki tuubude kuude de be wadiri
 juude mabbe den. Be accaano sujjangol jinnaaji
 din e sanamuuji tafiraadsi kanjje e kaalisi e sila e
 kaaye e ledde, dii waawataa yi'ude maa wowlude
 maa yahude. ²¹ Be ronki tuubude kadi fii ko be
 itti ko'e kon, e mbilankaaku mabbe ngun e jeeno
 mabbe ngon e guyaale mabbe den.

10

Fii Malaa'ikaajo on e Deftun Taggaakun kun

¹ Mi yi'i malaa'ikaajo goo dolnudo no iwra ka kammu, no bornii duulere, no hippii yaroowol ndiyan ngol. Yeeso makko ngon no wa'ita wa naange ngen, koyde makko ñen kadi no wa'ita wa tugaale yiite. ² Himo jogii deftun udditaakun ka jungo makko. O tippi koyngal makko jaamal ngal ka baharu, nanal ngal ka leydi. ³ O ewnii ko tiidi wano ngayuuri riggorta. E nder ko o ewnii kon, parnitte ñen jeedidi wadi hito. ⁴ Bay parnitte ñen jeedidi wadii hito, tawi mido hebulanii windugol, kono mi nani hawa ka kammu, no wi'a: «Wadu gundoo ko parnitte ñen jeedidi wi'i kon, hara a windaali.»

⁵ Awa kadi on malaa'ikaajo, mo mi yi'unoo no tippi ka ndiyan e ka leydi, towni jungo mun jaamo ngon, fewtini ka kammu. ⁶ O woondiri on Wuurudo haa poomaa, on Tagudo kammu e ko woni ton, tagi leydi e ko woni e mun, tagi baharu e ko woni e mun kon, wonde uuda alaa hande kadi. ⁷ Kono e nder balde ñe malaa'ikaajo njeedidabo on faandii wuttugol *liital ngal, gundoos Alla on laatoto wano o fejjinirannoo non kurkaadi makko din, dün ko annabaabe ben.

⁸ Onsay hawa, ka mi nanunoo kan iwrude ka kammu, wi'irimmi nii kadi: «Yahu, yettaa kun deftun udditaakun e jungo oo malaa'ikaajo tippudo ka baharu e ka leydi.» ⁹ Mi yahi ka malaa'ikaajo on, mi wi'i yo o jonnan deftun kun. O wi'immi: «Yettu kun, jaamaa. Kun hebbinay reedu maa ndun ko haadsi, kono kun weliray wa njuuri ka hunduko maa.»

¹⁰ Mi yetti deftun kun e juude malaa'ikaajo on, mi jaami. Kun weliri ka hunduko an wa njuuri,

kono bay mi bennii kun, reedu an ndun heewi ko haadfi. ¹¹ Mi wi'aa kadi: «Hida haani haalude kadi ko Alla longin maa ko yowitii e jamaaji buy e leyyi buy e haalaaji buy e lambe buy.»

11

Fii Seedeebe ben Dido

¹ Mi jonnaa kadi kudol kalin nanditayngol e sawru, mi wi'aa:

«Immo etaa suudu Alla ndun e *layyorde nden, limaa rewoobe ton ben. ² Kono dingiral suudu Alla ndun, accu dfun feere, wota a etu dfun, ko fi d'fon yedaama be gomdfinaa ben, be yaabay saare hormorde nden e nder lebbi cappande nay e d'fidi. ³ Mi newnanay seedeebe an borniibe conci heynordi ben d'ido, haalugol ko mi longini be e nder balde wuluure e teemed'de d'idi e cappande jeego.»

⁴ Ko ben woni led's'e *zaytuuni d'en d'idi e jod's'inirde pitilli d'en d'idi wonde yeeso Joomiraado leydi ndin. ⁵ Si god's'o no faalaa be wadude ko boni, yiite yaltay ka kundule mabbe, naama aybe mabbe ben. Ko nii kala faalaado be wadude ko boni warirte. ⁶ Hibe mari bawgal ombugol kammu ngun fii wota ndiyan aru e balde de be haalata ko Alla longini be kon. Hibe mari kadi bawgal waylugol di'e d'en yiiyan, e libugol ka hoore leydi kala noone nabbeeli saa'i mo be faalaa woo.

⁷ Nde be timminoyi seeditoore mabbe nden, kullii iwroyayngii ka *gaygii ngin alaa kattudi ngin haboyay be, ngii foola be, ngii wara.

⁸ Fureeji mabbe d'in luttay ka ballangal nden

saare mawnde nde Joomi mabbe on fempanoo e mun. Nden saare no jammaa *Saduumaa maa *Misira. ⁹ Yimbe jamaaji din fow e bolondaaji din fow e haalaaji din fow e leyyi din fow ndaaray fureeji mabbe din e nder balde tati e feccere, be saloo yo be surre. ¹⁰ Hodubé ka aduna ben weltoyoo fii mayde mabbe nden, be wona e nder weltaare, be neldindira, ko fii ben annabaabe dido lettii yimbe ben ka leydi.

¹¹ Bay balde tati e feccere d'en feyyii, foofaango ngurndan iwrungo e Alla naati e din fureeji, be immii, be darii, onsay kulol moolanaangol hebi ben yi'unoobe d'un. ¹² Be nani hawa tiiduka ka kammu, no wi'a be: «Yawee gaa!» Be yawi ka kammu e nder duulere, aybe mabbe ben yi'i be.

¹³ Ko e on saa'i d'on, dimbannde leydi tiifunde wadi, feccere sappabere e saare nden lancii. Yimbe guluuje njeedido maayiri sabu nden dimbannde leydi, heddiibe ben huli, mawnini Alla Jom kammu on. ¹⁴ Bone dimmo on feyyii, e hino tammo on no arude.

Fii Wuttannde Liital Jeedidabal ngal

¹⁵ Malaa'ikaajo njeedidabo on kadi wutti *liital mun ngal. Hawaaji tiidufi nanii ka kammu, no wi'a:

«Laamateeri aduna on wontii e juude Joomi-
raado on
e Toddaado makko on, d'un ko *Almasi-
ihu on,
o laamoto haa poomaa.»

¹⁶ Tawi mawbe noogay e nayo, joodfinoobe ka julle mun laamu yeeso Alla ñen, no jiccanii Alla sujjani mo, ¹⁷ e hoore hibe wi'a:

«Men jarnii ma, yo Alla Joomiraado,

Jom Bawgal, Woodaado e Woodanoodo,
ko huutordaa bawgal maa tiidfungal ngal
kon
e ko joddfindaa laamu maa ngun kon.

¹⁸ Hari leyyi ñin seytinii,
kono tikkere maa nden arii,
wondude e saa'i jaawugol maybe ñen,
e yobugol kurkaadi maa ñin, ñun ko
annabaabe ñen,
e laabube ñen e hulooobe innde maa nden,
gila e fandube haa e njandube,
e mulugol muloobe leydi ndin ñen.»

¹⁹ Onsay suudu Alla ndun ka kammu udditii,
*kankiranwal seeditoore makko nden feepi ka
suudu makko. Mayande wadi, e digge e parnitte
e dimbannde leydi e marmalle tiidufe.

12

Fii Debbo Sowiido on e Ningiwiñ ngin

¹ Maande njannde feepi ka kammu: tawi ko debbo borniido naange ngen, lewru ndun no ka ley koyde makko, e *meetelol ngol koode sappoo e didi ka hoore makko. ² Tawi ko sowiido, himo sonkude fii muuseendi jibingol ngol.

³ Maande goo kadi feepi ka kammu: tawi e hino *ningiwiñ njanin bodewii, ngii ko'e jeedidi e galaadi sappo, tawi katanji jeedidi no e hoore ñen ko'e. ⁴ Tawi bukkol maggii on no fitta feccere tammere koode ñen ka kammu, bugoo

ka leydi. Tawi ngin ningiwi no darii yeeso debbo wondo firtaade on fii modfugol booboo on nde o firtori mo. ⁵ O firtii booboo gorko, ardortoodo leyyi din fow labbooru njandi. On booboo makko wippitaa, nawraa ka Alla, ka jullere makko laamu. ⁶ Onsay debbo on dogi, yaari ka wulaa, ka o joginoo nokkuure ka Alla ebbannoo mo, fii no o dankoree d'on e nder balde wuluure e teemedde didi e cappande jeegoo.

⁷ Hare wadi ka kammu, Miikaa'iilu e malaa'ikaabe mun ben piiridi e ngin ningiwi. Ningiwi ngin e malaa'ikaabe mun ben kadi piiridi e mabbe. ⁸ Kono ngii foolaali, tawi wonunde alanaa ngii ka kammu, kangii e malaa'ikaabe maggii ben. ⁹ Ngin ningiwi njanin, d'un ko ndiya mboddi araniri wi'eteendi Ibuliisa maa Seytaane, ngin faljingii yimbe aduna on fow, bugodaa e malaa'ikaabe mun ben ka leydi.

¹⁰ Onsay mi nani hawa tiifuka ka kammu, no wi'a:

«Jooni kisiyee iwrudo e Alla men on arii,
wondude e bawgal mun ngal e *laamu mun
ngun,
e laamu Todfaado makko on, d'un ko *Al-
masiihu on.

Ko fii toojooowo musibbe men ben,
on wonnoodo be toopude yeeso Alla jemma
e palorma, bugaama.

¹¹ Be foolirii ngii yiiyan Baalun kun,
e sabu kongol seeditoore mabbe nden.

Awa kadi be ronkaali hebulaade
hay yeebugol ngurndan mabbe d'an
haa be maaya.

12 Ko dun wadi, weltee yo kammuuli
e onon hodufube ka kammuuli!

Bone wonanii leydi ndin e baharu on,
ko fii Ibuliisa tippike e mon.

Himo heewi tikkere,
bay o andii ko saa'ihun nii heddanii mo.»

13 Bay ngin ningiwii tawii bugaama ka leydi,
ngii jokki debbo hebunoodo boobo gorko on.

14 Onsay debbo on yedaa gabitanji simbirre
mawnde nden, fii ko o wiirira ka wulaa, ka
nokkuure makko, ka o danketee don e nder saa'i,
e nder saa'iji e feccere saa'i, ka wodditii mboddi
ndin. **15** Immorde ka sekko mayri, mboddi ndin
furi ndiyan wa maayo baawo debbo on, fii no
o yoolora ka maayo. **16** Kono leydi ndin faabii
debbo on, ndin leydi udditi hunduko mun kon,
ndi yari maayo ngo ngin ningiwii furiri sekko
mun kon. **17** Ngin ningiwii seytinani debbo on,
ngii yahi habugol luttube e jurriya makko on
ben, d'un ko ben doftiibe yamirooje Alla den,
humii e seeditoore Iisaa nden. **18** Onsay ngii darii
ka hoore njaareendi ka baharu.

13

Fii Kullii Saafingii ka Baharu ngin

1 Bawto d'un, mi yi'i kullii no saafoo ka nder
baharu marngii ko'e jeedidi e galaadi sappo,
tawi katanji sappo no e hoore dfin galaadi. Inde
hoynude Alla kadi no windii e hoore den ko'e.
2 Ngin kullii ngii mi yi'i no nandita e buutoori,
taape maggii on no nandita e taape kullii no wi'ee

ursaⁿ, sekko maggii on kadi no nandita e sekko ngayuuri. Ningiwii* ngin okki ngin kullii doole mun den e jullere mun laamu nden, wondude e bawgal mawngal. ³ Tawi wonnde e ñen ko'e maggii no wa'i wa wariraande soppannde, kono on barme waroowo sellinaa. Aduna on fow ñaldfi, be rewi ngin kullii. ⁴ Yimbe ben fow sujjani ningiwii ngin, bay ngii jonnii ngin kullii bawgal maggii on. Be sujjani ngin kullii kadi e hoore hibe wi'a: «Ko hombo wa'i wa ngin kullii maa hara ko hombo waawi ngii habude?»

⁵ Tawi ngin kullii no yedaa sekko wowlayko haalaaji mawnintinaare, hoyna Alla, tawi hingii jonnaa bawgal e nder lebbi cappande nay e ñidfi. ⁶ Hingii udditi sekko maggii on, hingii hoyna Alla, hoyna innde makko nden e wonirdu makko ndun, e ben hodube ka kammuuli. ⁷ Tawi ngin kullii no newnanaa habidugol e yimbe Alla ben, foola be. Tawi hingii okkaa bawgal e hoore bolondaaji din fow e jamaaji ñin fow e kala haala, e hoore ley yi din fow kadi. ⁸ Tawi hodube ka aduna ben fow sujjanay ngii, dñun ko ben be innde mun windaaki gila ka fudfoode aduna ka deftere ngurndan wonannde Baalun hettanookun layya kun.

⁹ Mo no mari noppi nanirdi yo nanu!

¹⁰ On mo no hoddiranaa maccindfinagol,

bee o maccindfinoo.

On mo no hoddiranaa warireede kaafa,

bee o wariree kaafa.

Ko ñun wadi si yimbe Alla ben

ⁿ **13:2** 13.2 «Ursa» ko kullii njanii marngii leebi, juutungii pedsaali.

no haani ñajnaade, gomdina.

Fii Kullii Sortiingii ka Leydi ngin

¹¹ Bawto d̄sun, mi yi'i kullii goo no sortoo ka nder leydi, marngee galaadi d̄idi nanditaydi e galaadi ga'un baalun, hingii wowliraynōo wa ningiwii. ¹² Tawi ngin kullii no wada bawde kullii aranii ngin fow e tawnde maggii. Ngii wadi feere no leydi ndin e hodubē e hoore mayri ben sujjirana ngiya kullii aranii sellinananoongii barme waroowo. ¹³ Ngii wadi maandeeji moolanaadi, haa hay ngii jippini ka leydi yiite iwnge ka kammu yeeso yimbe ben. ¹⁴ Tawi ngin kullii no faljiniraynōo hodubē ka aduna ben maandeeji di ngii yedanoo wadugol din yeeso ngiya kullii aranii, e hoore hingii yamira ben yimbe wonbe ka aduna yo be wadu nandolla ngiya kullii soppiranoongii kaafa, kono ngii wuuri. ¹⁵ Ngin kullii yedaa bawgal wadangol ndun nandollaaru ngiya kullii foofaango ngurndan fii no ndun nandollaaru waawira wowlude, ndu wona sabu kala on mo jabaali sujjande ndu no wariree. ¹⁶ Ngii karhi kadi fow, gila e fandubē haa e njandubē, galo e baaso, dimo e maccudo wadangol maande ka jungo mun jaamo maa ka tiinde, ¹⁷ hara kadi hay gooto waawataa soodude maa yeeya si alaa nden maande, nden-le ko innde ngin kullii maa adadu innde maggii on. ¹⁸ Doo non, maa faamu: On mo no mari hakkil, yo limu adadu innde ngin kullii, ko fii ko adadu nedfanke non. On adadu ko teemedde jeegoo e cappande jeegoo e jeegoo.

14

Fii Baalun kun e Sottaabe ben

¹ Bawto dun mi yi'i Baalun kun no darii ka Fello *Siyuuna, wondude e yimbe guluuje teemedere e cappande nayo e nayo, be innde makkun e innde Ben makkun on windii e tiide mun. ² Mi nani hawa ka kammu, wa hawa di'e d'uuufude maa wa hawa riggannde tiifunde, tawi kan hawa ka mi nani no nandita e hito korli ci hodooibe hodata. ³ Tawi ben hodooibe no beyta beytol kesol yeeso jullere laamu nden e yeeso tagooje nay wuuruude den e yeeso mawbe ben. Tawi hay gooto waawataa ekkitaade ngol beytol si hinaa bee guluuje teemedere e cappande nayo e nayo, sottanoobe ka aduna. ⁴ Dun ko ben be tuuninoraali rewbe, be woni laabube, be andaali debbo. Be jokki *Baalun kun kala ka kun yaari. Be woni sottaabe e hakkunde yimbe ben, be weebitanaa Alla e Baalun kun wa ko adaa sojiteede. ⁵ Awa kadi karaaje maßbe jantaaki penaale, ben ko be aldaa e feloore.

Fii Ewol Naawoore Joomiraado on

⁶ Mi yi'i kadi malaa'ikaajo goo no wiira ka weeyo dow, no jogii Kibaaru Moyyo poomayan-keejo on fii feñjinangol mo hodube ka leydi ßen e kala lepol e kala bolondaa e kala haala e kala jamaa. ⁷ Tawi on malaa'ikaajo no wowla hawa tiifsuka, wi'a: «Hulee Alla, mawninon mo, ko fii saa'i mo o naawata e mun on hewtii. Awa sujjanee on Tagudo kammu ngun e leydi ndin e baharu on e bulli ndiyan din!»

⁸ Malaa'ikaajo d'immoo hikkiido e arano on kadi wi'i: «Nde yanii! Ndee saare *Baabiila

mawnde mandilinirnde ley yi din fow himmeeji jinaa mun, yanii!»

⁹ Malaa'ikaajo tammo hikkiido e aranbe ben dido no wowla hawa tiisuka, wi'a: «Kala on sujjando kullii ngin e nandolla maggii on, hebi maande maggii on ka tiinde maa ka jungo mun, ¹⁰ yaray njaram tikkere Alla nden wancinaadsan ka neddukun tikkere makko hara dan jillaaka, o lettiree kadi mbollan yiite yeeso malaa'ikaabe laabube ben e Baalun kun! ¹¹ Curki lette maßbe den yaway haa poomaa, e hoore fowtaare alanaa be jemma e nalorma, dun non ko kala on sujjando ngin kullii e nandolla maggii on, e kala on hebudo maande innde maggii on.»

¹² Ko dun wadi si yimbe Alla doftiibe yamirooje Alla den, duumii e gomdingol lisaan ben, no haani ñajnaade. ¹³ Mi nani kadi hawa ka kammu, no wi'a: «Windu wonde: ‹Maybe gila jooni no humondiri e Joomi on ben ko malaabe.›»

Ruuhu Allaahu on wi'i: «Ko non woniri, be fowtoto golleeji maßbe din, bay kuudse maßbe den no jokki be.»

Fii Baagol Aduna on

¹⁴ Bawto dun mi yi'i duulere daneere, tawi nanditayso e bii-aaden no joodii e hoore nden duulere, tawi *meetelol kañje no ka hoore makko, tawi wortowal welngal no ka jungo makko. ¹⁵ Tun malaa'ikaajo goo yalti e suudu Alla ndun ka kammu, no ewnoo ko tiidi, wi'a on joodiido e nden duulere: «Yettu wortowal maa ngal, wa'aa, ko fii saa'i baagol ngol hewtii! Ko wa'etee kon ka hoore leydi bendii!» ¹⁶ Onsay on

joodiido e nden duulere fewtini wortowal mun ngal ka leydi, hayli, ko woni ka leydi kon wa'ii.

¹⁷ Malaa'ikaajo goo kadi yalti e suudu Alla wondu ka kammu ndun, tawi on kadi no jogii wortowal welngal. ¹⁸ Tun malaa'ikaajo goo kadi jogiido bawde e hoore yiite ngen yalti ka *layyorde, o ewnii oya malaatikaajo jogiido wortowal welngal ko tiidi, o wi'i mo: «Yettu wortowal maa welngal ngal, tettaa dukke *wiju wonde den ka leydi, ko fii biibbe majje on bendil!» ¹⁹ On malaa'ikaajo fewtini wortowal mun ngal ka leydi, hayli, o tetti wijuujje wonde den ka leydi, o bugii ko o tetti kon ka nder wuugirgal njanal tikkere Allaahu on. ²⁰ Den wuugoya ka sera saare, yiiyan yalti e ngal wuugirgal haa tooweendi majjan hewti lagambe pucci din, junndi ilol majjan on hawri embere kilomeeterji teemedde tati.

15

Fii Albala'uuji Sakkitori din Jeedidi

¹ Onsay mi yi'i maande moolanaande ñaldfinnde goo kadi ka kammu, nden-le ko malaa'ikaabe njeedido jogiibe albala'uuji din jeedidi. Ko din albala'uuji woni sakkitori ciin, ko fii ko kanji woni timmoode tikkere Alla nden. ² Mi yi'i kadi ko wa'i wa baharu jalbirdo wa jaaman, jilludo yiite. Tawi foolube ngiya kullii e nandolla mun e adadu innde mun nden no darii e hoore on baharu jalbirdo wa jaaman, hibe jogii korli Allaahu on. ³ Hibe beyta beytol Muusaa, on jiyaado Alla, e beytol *Baalun kun, hibe wi'a:

«Yaa an Alla, Joomiraado, Jom Bawgal,
 kuude maa ñen ko mawde,
 awa kadi ko hawniide,
 laawi maa ñin ko feewudi, goongindi,
 yo Lando leyyi fow!

⁴ Yaa an Joomiraado,
 hara ko hombo ronkay-maa hulude,
 maa ronkata mawninde innde maa nden?
 Bay ko an tun woni *Seniido!
 Bay leyyi ñin fow aray sujjane!
 Bay kuude maa feewude ñen feñjinaama!»

⁵ Bawto ñun mi yi'i kadi nokkuure hormorde
 wonde ka nder wonirdu ndu seeditoore nden
 woni e mun ndun, no udditoo ka kammu. ⁶ Tawi
 malaa'ikaabe njeedido jogiibe albala'uuji ñin
 jeedidi no yalta e nden nokkuure. Tawi ñen no
 bornii conci laabudi jalbudi, hibe daditii dattii
 kañje ka fewndo berde mañbe. ⁷ Wonde e ñen
 tagooje nay wuurude jonni ñen malaa'ikaabe
 njeedido pelette kañje jeedidi heewude tikkere
 Allaahu on, ñun ko on Wuurudo haa poomaa.
⁸ Onsay nden nokkuure hormorde heewi curki
 sabu mangu Allaahu on e bawgal makko ngal.
 Tawi hay gooto waawataa naatude e ndun suudu
 haa ñin albala'uuji jeedidi di malaa'ikaabe ñen
 njeedido jogii, timma.

16

Fii Pelette Tikkere Alla ñen Jeedidi

¹ Mi nani kadi hawa tiiduka iwrude ka
 nokkuure hormorde, no wi'a malaa'ikaabe ñen
 njeedido: «Yahee, hibboyon ka leydi ñen pelette
 jeedidi tikkere Alla nden!»

² Arano on yahi, hibbi feletere mun nden ka hoore leydi, tun temmeeje kaanude muusude hebi be nden maande ngin kullii wonnoo e mun, sujjani nandolla maggii on.

³ Dimmo on kadi hibbi feletere mun nden ka baharu, on baharu wonti yiyan wa yiyan maydo. Kala ko wuurunoo ka baharu maayi.

⁴ Tammo on kadi hibbi feletere mun nden ka maaje e ka bulli ndiyan, di'e den wonti yiyan.

⁵ Tun mi nani malaa'ikaajo di'e den no wi'a:

«Ko a Feewudo,
an oo Woodaado e Woodanoodo,
an oo *Seniido,
sabu ko jaawirdaa nii kon.

⁶ Ko fii be hibbiino yiyan yimbe Alla ben
wondude e yiyan annabaabe ben,
awa jooni a yedii be yiyan ko be yara, hibe
foddi e d'un!»

⁷ Mi nani kadi *layyorde nden no wi'a:
«Hiiyii, yaa an Alla Joomiraado, Jom Bawgal,
jaawooje maa den ko goongaaaje, ko
feewude!»

⁸ Onsay nayabo on kadi hibbi feletere mun nden ka naange, nge yedaa sunnirgol yimbe ben yiite.

⁹ Yimbe ben sunniraa nguleendi tiisundi, be woni e hoynugol innde Alla nden, on mardo bawgal e hoore din albala'uuji, be ronki tuubude fii no be mawninira mo, kanko Alla.

¹⁰ Njowabo on kadi hibbi feletere mun nden ka hoore jullere laamu kullii ngin, laamateeri maggii on nibbiti. Yimbe ben nati dende hakkee muuseendi, ¹¹ be woni e hoynugol Alla kammu ngun sabu muuseendiji mabbe din e

temmeeje mabbe ñen, kono be ronki tuubude kuude mabbe ñen.

¹² Njeegabo on kadi hibbi feletere mun nden ka maayo njano Furaatiwol. Ndiyan ñan beebei fii wadangol lambe iwräybe funnaange ñen ñatal.

¹³ Mi yi'i ruuhuji tati tuunudi nanditaydfi e toti-paccala no yalta ka sekko ngin *ningiwii e ka sekko kullii ngin e ka hunduko waditiido annabaajo on. ¹⁴ Tawi ko ruuhuji jinnaaji wondi wafude maandeeji, yaara ka lambe leydi ndin fow, fii mottindirgol be fii hare palaande mawnde Alla Jom Bawgal on.

¹⁵ «Awa mido ardude wa ngujjo! Maloore wonanii on hakkilando, mari conci mun ñin, fii wota o laato holdo, e wota hersa makko kan bangu!»

¹⁶ Din jinnaaji no mottindira ñen lambe e ndee nokkuure wi'eteende Har-Magadaana e haala Yahuudiyanke. ¹⁷ Malaa'ikaajo njeedidabo on hibbi feletere mun nden ka hendl, hawa tiiduka yalti ka suudu Alla iwrude ka jullere laamu, no wi'a: «Timmii!» ¹⁸ Mayande e digge e parnitte wadii wondude e dimbannde leydi tiidunde, nde sifa mun e tiidude hari wadaali gila yimbe ñen woni ka hoore leydi. ¹⁹ Saare njanne nden feccii pecce tati, ca'e leyyi din yani. Alla anditi fii saare *Baabiila mawnde nden, o yedi nde feletere njaram tikkere makko tiidunde nden. ²⁰ Surije ñen fow dogi, pelle ñen kadi ronkaa yiiteede. ²¹ Marmalle njane, de tawata nde bee e majje ko wa kilooji cappande nay, iwi ka kammu, yani e hoore yimbe ñen. Be woni e hoynugol Alla

sabu on albala'u iwrudo e den marmalle, ko fii
hari on albala'u ko tiifudo haa feyyiti.

17

Fii Naawoore Debbo Cagaajo Mawdo on

¹ Bawto dfun, goddo e ñen malaa'ikaabe njeedido joginoobe pelette ñen jeedidi ari, wi'immi: «Aru, mi hollete naawoore debbo cagaajo mawdo on, ka joodii ñon ka di'e ñuuðufuse. ² Ko e makko, kanko on debbo cagaajo, lambe aduna ñen jokkiri jinaa, e hodufube ka aduna ñen mandiliri jinaa makko on!»

³ Onsay Ruuhu Allaahu on tippii e an, malaa'ikaajo on nawrimmi ka wulaa. Mi yi'i debbo no joodii e hoore kullii bodewii heewungii inde hoynude Alla ñen, marngii ko'e jeedidi e galaadi sappo. ⁴ Tawi on debbo no bornii conci bodeeji e firsinaadi, himo cudori kanje e kaaye hittude e kode hittude. Tawi himo jogii feletere kanje heewunde ko niddinaa e tuude jinaa makko on. ⁵ Tawi innde gundoore no windii ka tiinde makko, ko woni ñun ko: «Saare *Baabiila mawnde nden, neene cagaabe ñen e ko niddinaa kon ka hoore leydi.» ⁶ Mi yi'i on debbo no mandiliri yiyan yimbe Alla ñen, e yiyan seedeebe Iisaa ñen.¹

Bay mi yi'ii mo, mi ñaldfi fota. ⁷ Malaa'ikaajo on wi'immi: «Ko hondun ñaldfudaa? Mi andinte gundoo debbo on e kullii ngii ko'e jeedidi e galaadi sappo ngii o wadfdii ngin. ⁸ Kullii ngii

¹ **17:6** 17.6 «Mandilirgol yiyan yimbe Alla ñen» no firi weltorgol ko be waraa kon.

yi'udaa ngin hari no woodanoo, kono jooni ngii woodaaka. Hingii faandii yawude ka *gaygii ngin alaa kattudi ngin, ngii yaha ka hayrannde. Awa kadi hodube ka aduna ben, be tawata innde mun windaaka ka deftere ngurndan gila ka fuddsoode aduna, be naldoyay yi'ugol ngin kullii, ko fii hari hingii woodanoo, kono jooni ngii woodaaka, awa kadi ngii feejitay.

⁹ «Doo non, maa hakkil wonduki e faamu: Ko'e ñen jeedidi ko pelle jeedidi de debbo on joodii e hoore mun ñen. Ko de lambe ben njeedido kadi: ¹⁰ njowo yanii, godso on no woodaa, oya on araali taho. Nde o aroyi, himo haani wonude seeda. ¹¹ Kullii woodanoongii, ngii woodaaka jooni ngin, kangii tigi ko ngii lando njeetatabo, ko ngii godso kadi e njeedidoobe ben, hingii yahude ka hayrannde.

¹² «Galaadi sappo di yi'udaa din ko lambe sappo, be fuddsaaki taho laamaade, kono ko hendoraybe laamu wa lambe e nder saa'i gooto fii laamodugol e kullii ngin. ¹³ Kambe ko be ebboore wootere, be jonnay doole mabbe e laamu mabbe kullii ngin. ¹⁴ Be habay Baalun kun, Baalun kun foola be, ko fii ko kun Koohoojo koohoobe, Landó lambe, ko wondube e makkun ben woni noddaabe e subaabé e sella-findeebe.»

¹⁵ O wi'immi kadi: «Di'e de yi'udaa cagaajo on no joodii e mun ñen, ko jamaaji din e dente moolanaade ñen e leyvi din e haalaaji din. ¹⁶ Galaadi sappo di yi'udaa din wondude e kullii ngin anoyay cagaajo on, di yetta kala ko o jeyi, di boora mo, di jaama bandu makko ndun, di sunnira mo yiite. ¹⁷ Ko fii Alla wadii ka berde

majji huuwugol ebboore makko nden e nder miijo wooti fii yo di okku laamu majji ngun kullii ngin haa tuma daaluyeeji Alla din laatii. ¹⁸ Awa kadi debbo mo yi'udaa on ko saare mawnde marnde laamu e hoore lambe aduna ben.»

18

Fii Lancagol Saare Baabiila nden

¹ Bawto dñun, mi yi'i malaa'ikaajo goo no iwra ka kammu, jogiido bawgal njanal, aduna on jalbiri annoora makko on. ² O ewnii ko tiidi, o wi'i:

«Nde yanii! Saare *Baabiila mawnde nden yanii!

Nde wontii hodo jinnaaji,
suudorde kala ruuhu tuunuđo,
e suudorde kala sondu harmundu e anaandu.

³ Ko fii leyvi din fow mandilirii
himme jinaa mayre on,
lambe aduna ben kadi wattodi
e mayre e nder jinaa mayre on,
awa kadi njulaabe ben ka leydi aldinorii
ngalu mayre feyyitungu ngun.»

⁴ Mi nani kadi hawa goo ka kammu, no wi'a:
«Yaltee e mayre, yo jamaa an,

fii wota on tawde e junubaaji mayre din,
e wota on hebu gebal albala'uuji mayre din.

⁵ Ko fii junubaaji mayre din dewnondirii haa ka
kammu,
awa kadi Alla anditii angal peewal mayre on.

⁶ Wadiranee nde wano nde wadiri non,

sowon kuude mayre den nde didi, jonniton
nde.

Jardukun, kun nde yarniri kun,
jonnitiree nde kun laabi didi!

⁷ Wano nde mawninornoo non,
e no nde yollornoo e mbeleede non,
jonnitiree nde wano non tampere e
yoomere!

Ko fii hinde wi'i ka bernde mayre:
«Min mido joodii e nder laamu,
hinaa mi heynotoodo,
awa kadi mi yoomataa few!»

⁸ Sabu dfun,
albala'uuji mayre din yanay e hoore mayre
nande wootere,
dfun ko mayde e yoomere e heege,
nde sunniree kadi yiite.

ko fii Alla Joomiraado, Naawudo nde on, ko Jom-
doole!»

⁹ Lambe aduna ben fow, wattodunoobe e mayre
e nder jinaa e mbeleede, wulloyay fesa fii mayre,
nde be yi'i curki sumugol mayre on. ¹⁰ Hibe darii
ka wodđitii sabu kulol tampere mayre ngol, be
wi'oya:

«Bone, bone wonanii saare Baabiila mawnde
nden,
dfun ko saare dolnunde nden!

E nder saa'ihun gootun pet jaawoore maa nden
arii!»

¹¹ Njulaabé ben ka leydi yooma, be wulla fii
mayre, ko fii hay gooto soodataa hande kadi ko
be yeeyata kon, ¹² dfun ko kañje e kaalisi e kaaye
hittude e kode hittude e bagi d̄aatudo e bagi
bode e bagi d̄ewludo e bagi firsinaado, e kala

noone ledde uurude e kala piiji moyyiniraadi
niiye mawba, e kala piiji hittudi moyyiniraadi
ledde hittude e sila e njande e kaaye daneeje,
¹³ wondude e cebe ledde kanel uurude e urngal-
looji e angiriji, e *buto ledde no wi'ee *mirri, e
buto ledde no wi'ee libaana, e njaram *wijnu e
nebbe e ngawri e condi ngawri e na'i e baali e
pucci e *giri-girijje e maccube e wonkiji yimbe.

¹⁴ No wi'a: «Piji di wonkii maa kin himmani
din wodditike ma yo saare Baabiila! Piji hittudi
din maa jalbudi din fow fuutike ma, awa kadi
be hettataa di hande kadi!»

¹⁵ Njulaabe aldfinorbe nde ben wonay ka
wodditii sabu kulol tampere mayre ngol. Be
yoomoya, be wulla, ¹⁶ be wi'oya:
«Bone, bone wonanii ndee saare mawnde,
borniinde conci dsaatudi,
bodeeji e firsinaadi,
cudori kaanje e kaaye hittude e kofe
hittude!

¹⁷ E nder saa'ihun gootun pet,
ngun ngalu mayre e mawnude caabii!»
Hooreebe laade ben fow e gollooobe ton ben
fow e doginoobe ben e wuuirbe baharu ben
fow darii ka wodditii. ¹⁸ Bay be yi'ii curki
sumugol mayre on, be woni e ewnagol, wi'a:
«Ko saare honde nanditaynood e ndee saare
mawnde!» ¹⁹ Tawi hibe bugotonoo mbullaari ka
ko'e mabbe, yooma, wulla, hibe ewnoo wi'a:
«Bone, bone wonanii ndee saare mawnde,
nde kala on mardo laana ka baharu aldfinori
ngalu mun!
E nder saa'ihun gootun pet nde caabii!»

²⁰ Awa welto e hoore mayre, yo kammu, onon men kadi yo gomdinbe e *sahaabaabe e annabaabe, ko fii Alla jaawii nde fii ko nde wadi on kon!

²¹ Onsay malaa'ikaajo dolnuđo yetti hayre nanditaynde e laggorde moolanaande, bugii ka baharu, e hoore himo wi'a:

«Ko nii saare Baabiila mawnde nden bugortee doole,

hara nde yiitetaake hande kadi!

²² Nanetaake hande kadi hito hodoođe hoddu e yimoobē e wuttoobē ceri e *liite!

Hande kadi jnejno yi'etaake e maa,

kala non noone mecce,

awa nanetaake hande kadi hito undugal e maa.

²³ Awa kadi ndaygu lampu jalbataa e maa hande kadi,

hawa yettuđo e yettaado nanetaake hande kadi.

Ko fii hari ko njulaabe maa ben woni teddube ben ka leydi,

awa kadi leyyi din fow faljirii sabu mblankaaku maa ngun!

²⁴ Awa kadi ko e maa yiyan annabaabe ben e gomdinbe ben e kala waraado ka hoore leydi hibbaa.»

19

Fii Mantoore nden ka Kammu e Peera fii Baalun kun

¹ Bawto dñun, mi nani hawa tiisuka immorde e jamaa duududo ka kammu, no wi'a:

«Mantoore wonanii Alla!

Kisiyee e mangu e bawgal ko Alla men on
wonani!

² Naawooje makko d'en ko goongaaje feewude!
O jaawii cagaajo mawdo on,
faljiniraynoodo yimbe aduna on jinaa mun
on.

Alla kadi yottanike yiyan kurkaadsi mun dan o
hibbi d'an.»

³ Be wi'i kadi dimmun:
«Mantoore wonanii Alla!

Curki nden saare yaway haa poomaa!»

⁴ Tawi mawbe ben noogay e nayo e tagooje
nay wuuruude den no jiccino, no sujjana Alla
Joodiido ka jullere laamu on e nder wi'ugol:
«Aamiina, mantoore wonanii Alla!»

⁵ Hawa kadi yalti ka jullere laamu no wi'a:
«Ko onon yo jiyaabe makko,
huloobe mo,
fandube e njandube,
on fow mantee Alla men on!»

⁶ Mi nani kadi wa hawa jamaa dsuufudo e wa
hito di'e dsuufude e wa hito riggande tiifude,
no wi'a:
«Mantoore wonanii Alla!

Ko fii Alla Joomiraado on,
on Jom Bawgal,
joddfinii *laamu mun ngun.

⁷ Weltoden, wonen e nder welo-welo, mawninen
mo,

ko fii peera Baalun kun hewtii,
jombajjo makkun on hebulike,

⁸ o yedaama bornagol conci daatufi jalbudi
laabufi.»

(Ko kuude feewude yimbe Alla ben woni din
conci.)

⁹ Malaa'ikaajo on wi'immi kadi yo mi windu wonde: «Malooore wonanii ñen noddaabe ka nafakka peera *Baalun kun.» O wi'i kadi: «Dii ko daaluyeeji Alla goongaaji.»

¹⁰ Onsay mi jicci ka koyde makko fii sujjangol mo. Kono o wi'immi: «Accu, wota a wadu ñun! Ko mi kurkodoowo e maa e musibbe maa ben, jogiibe seeditoore Iisaa nden. Sujjan Alla! Ko seeditoore Iisaa nden woni ruuhu longinoowo annabaabe ben.»

Fii Wadfdiido Puccu Ranewu on

¹¹ Mi yi'i kadi kammu ngun no udditii, mi tawi e hino puccu ranewu, tawi wadfdiido ngu on no wi'ee Sella-Findeejo e Goongaajo. Ko peewal o naawirta, o habira. ¹² Gite makko ñen no wa'i wa joyngol yiite, *meetelli buy no ka hoore makko. Innde no windii e makko nde hay gooto andaa si hinaa kanko. ¹³ Dolokke mo o bornii on no moddi yiyan. Himo wi'ee Daaluyee Alla on. ¹⁴ Tawi koneeli wondi ñin ka kammu no wadfdii pucci daneeji, no jokki mo, hibe bornii conci daatudi daneeji laabudi. ¹⁵ Tawi kaafa welka no yalta ka hunduko makko fii foolugol leyyi ñin, awa kadi o ayniroyay be labbooru njandi, o yaaba, o munca *wiijnuuje ñen ka wuugirde tikkere moolanaande Alla Jom Bawgal nden. ¹⁶ Tawi innde no windii ka dolokke makko e ka busal makko, ñun ko: «Lando Lambe e Koohoojo Koohoobe.»

¹⁷ Mi yi'i kadi malaa'ikaajo no darii ka nder naange, no ewnoo colli wondi wiirude ka weeyo dow ñin fow ko tiidi, wi'a: «Aree, mottondiron fii nafakka mawdo Alla on! ¹⁸ Naamon balli

lambe ben, e balli hooreebe suufaaabe ben, e balli dolnube ben, e balli pucci e wadſotonooþe ði ben, e balli yimbe ben fow, rimþe e maccube, fandubé e njandubé!»

¹⁹ Onsay mi yi'i kullii ngin e lambe aduna ben e koneeli mun ðin no mottondiri fii habugol wadſiido puccu ranewu ngun e konu mun ngun. ²⁰ Kullii ngin nangidaa e waditiido annabaajo on, dun ko on wadunoodo maandeeji yeeso maggii ði o ðaynirnoo hebunoþe maande kullii ngin ben, sujani nandolla maggii on. Be ðidoo non be bugaa ka weendu yiite ko be wurþe, dun ko ka mbollan yiite. ²¹ Beya wariraa kaafa yaltaynooka ka hunduko wadſinoodo puccu ngun on, colli ðin fow naami balli mabþe ðin haa haari.

20

Fii Laamu ngu Duubi Wuluure ngun

¹ Onsay mi yi'i kadi malaa'ikaajo no iwra ka kammu, no jogii ka jungo mun saabiwal *gaygii ngin alaa kattudi ngin wondude e jolokowal moolanaangal. ² O nangi *ningiwii ngin, e maanaa ndiya mboddi araniri, dun ko Ibuliisa maa Seytaane, o jolki ndi fii duubi wuluure. ³ O bugii ngin ka nder *gaygii ngin alaa kattudi ngin, o soki, o ndoli kadi dow maggin, fii wota ngin faljin leyyi ðin hande kadi haa duubi wuluure ðin timma. Kono bawto dun, bee ngin jolkitoyee embere saa'i fahin.

⁴ Mi yi'i kadi julle laamu, tawi joofiibe e ðen ben no yedaa bawgal naawugol. Mi yi'i wonkiji be ko'e mun tayiraa kaafa ben sabu seeditanagol

Iisaa e daaluyee Alla on, ñen be sujanaano ngiya kullii e nandolla mun on, ronki hebude maande ka tiinde maa ka jungo. Be wurnitaa, be laamodi e *Almasiihu on e nder duubi wuluure. ⁵ Dun ko ummutal aranal ngal non. Tawi beya maybe heddiibe wurnitetaake haa tuma duubi wuluure din timmi. ⁶ Maloore e *senaare wonanay ben tawoyteebe e ummutal aranal ngal, ko fii maybe dimmere nden heboytaa bawgal e hoore ben. Ben-le ko bee *yottinoyoobe sadaka ka Alla e ka Almasiihu on. Be laamodoya e makko e nder duubi wuluure.

⁷ Nde duubi wuluure din timmoyi, Ibiliisa yaltinoyte ka kaso, ⁸ o yaltoya fii faljingol leyvi wondi e cobbuli aduna on nay, din ko Yaajuuja e Maajuuja en,p o mottindira be fii wadugol hare. Tawa dñudoral mabbe ngal no fota e njaaressi ndin ka baharu. ⁹ Be hebbini hoore leydi ndin fow, be hundi daakorde yimbe Alla ñen e saare buraande yideede nden, kono yiite iwri ka kammu, muli be. ¹⁰ Onsay Ibiliisa, faljinnoodo ñen yimbe on, bugaa e nder ndun weendu yiite e mbollan mun, ka ngiya kullii e waditiido annabaajo on buganoo don. Be lettee don jemma e jalorma haa poomaa.

Fii Naawoore Sakkitorde nden

¹¹ Mi yi'i kadi jullere laamu moolanaande daneere e joodiido e mayre on. Tun kammu ngun e leydi ndin dogi mo, din ronki hebude ka wona. ¹² Mi yi'i kadi maybe ñen, tawi ñen

p 20:8 20.8 Ko woni «Yaajuuja e Maajuuja» e haala Yahuudiyanke ko «Gog e Magog», e maanaa aybe jamaa Alla on.

no dariai yeeso nden jullere laamu, d'un non ko gila e fandube haa e njandube. Onsay defte udditaa. Bawto dun, deftere goo kadi udditaa, tawi nden ko deftere ngurndan dan. Ben maybe naawiraa kuude mabbe windiide den e den defte. ¹³ Baharu on jonniti maybe wonnoobe e makko ben. Mayde nden e jahannama kadi jonniti maybe wonnoobe e mun ben, mo kala e ben naawiraa kuude mun den. ¹⁴ Onsay mayde nden e jahannama bugaa ka weendu yiite, ko ndun weendu yiite woni mayde dimmere nden. ¹⁵ Kala mo innde mun windanooki e nder deftere ngurndan nden, bugaa ka nder weendu yiite.

21

Fii Kammu Hesu ngun e Aduna Keso on

¹ Bawto d'un, mi yi'i kammu hesu e aduna keso, bay hari nguya kammu hinngu e oya aduna kidso feyyii, tawi kadi baharu alaa. ² Onsay mi yi'i saare hormorde nden, d'un ko saare Yerusalaam heyre, no iwra ka kammu ka Alla, tawi nden no pariraa wano jombajjo parirtee fii moodi mun. ³ Mi nani kadi hawa tiiduka iwrude ka jullere laamu no wi'a: «Awa jooni wonunde Alla nden no e hakkunde yimbe ben. O hodiday e maßbe, be wona jamaa makko, kanko Alla tigi o wonday e maßbe, o wona Alla maßbe. q ⁴ O fitta kala gongol ka gite maßbe, hara hande kadi mayde waditataa, yoometaake, fesetaake, muuseendi waditataa. Ko fii haray sifa din piiji arani fow feyyiino.»r

q 21:3 21.3 Isa. 7.14 r 21:4 21.4 Isa. 25.8 e 65.17-19

⁵ Onsay on Joodiido e nden jullere laamu wi'i: «Mido heydintinde piiji din fow!» O wi'immi kadi: «Windu, ko fii dii daaluyeeji ko holniidi e goongaaji!» ⁶ O wi'immi fahin: «Timmii! Ko min woni Halfeere aranere nden e sakkitorde nden, ko min woni Fuddsoode nden e Rawnoode nden. On mo no d'ondaa, mi okkoray mo ko o yara ka bündu ndiy'an ngurndan, hara ontigi yobataa. ⁷ Ko d'un wonata ndondi fooludo on. Mi wonay Alla makko, kanko o wona biddo an.^s ⁸ Kono wadaybe hula yillitoo ben e be gomfinaa ben e tuunuþe ben e ittoobe ko'e ben e jinoobe ben e mbileeþe ben e rewoobe sanamu ben, e fenoobe ben fow: gebal ben ngal ko ka weendu yiite hubbundu e mbollan mun woni! Ko ndun non woni mayde dimmere nden!»

Fii Saare Yerusalaam Heyre nden

⁹ Bawto d'un, goddo e ben malaa'ikaabe njeedido, joginoobe pelette jeedidi heewudse albala'uuji jeedidi sakkitori din, ari, wi'immi: «Aru mi holle jombajjo on, dun ko sonnaajo Baalun kun.» ¹⁰ Ruuhu Allaahu on tippii e an, malaa'ikaajo on nawrimmi e hoore fello njano toowungo, o hayninimmi saare Yerusalaam hormorde nden ka iwrata ka kammu ka Alla. ¹¹ Tawi nden saare no jalbiri annoora Alla on. Jalbeendi mayre ndin no nandita e jalbeendi hayre hit-tunde fota, wa hayre yasbe, jalbirnde wa jaaman. ¹² Tawi tata mayre on no njandfi, no toowi, hinde mari kadi dambude sappoo e dfidi. Malaa'ikaabe sappoo e dfido no e den dambude, tawi inde

^s 21:7 21.7 Zab. 89.27-28 e 2Sam. 7.14

*bolondaaji bibbe Isra'iila ben sappoo e didi no windii e majje. ¹³ E hino no dambude mayre ñen woniri: ko tati funnaange, tati ka nano, tati ka jaamo e tati ka hirnaange. ¹⁴ Tata nden saare ko kaaye sappoo e didi didiraa, inde sappoo e didi no e hoore ñen kaaye. Den inde-le ko inde *sahaabaabe Baalun kun sappoo e dido.

¹⁵ Tawi on wonnoodo lan yewtude no joginoo sawru kanjne fii ko o ebbira ittiri saare nden e dambude mayre ñen, wondude e tata mayre on. ¹⁶ Tawi mbaaloodi nden saare ko cobbuli nay fotaydi, tawi junndi mayre on e yanji mayre on no fota. O ebbiri saare nden ndun sawru ndu o joginoo, dun hawri embere sagara yaaduji guluuji sappoo e didi.^t Tawi junndi mayre on e yanji mayre on e tooweendi mayre on no fota. ¹⁷ On malaa'ikaajo ebbiri tekkeendi tata on embere sogone neddanke, dun hawri sogone teemedere e cappande nay e nay. ¹⁸ Tawi on tata ko hayre yasbe darniraa. Tawi saare nden kapun ko kanjne laabirdo wa biini. ¹⁹ Tawi didoodiji tata nden saare no fotiniraa kala noone kaaye hittude. Didoodi araniri ndin ko yasbe, dimmiri ndin ko saafira, tammiri ndin ko kalseduwan, nayabiri ndin ko zumuruudu, ²⁰ jowabiri ndin ko sardoniisi, jeegabiri ndin ko sardir, jeedidabiri ndin ko kirisooli, jeetatabiri ndin ko beril, jeenayabiri ndin ko topaazi, sappabiri ndin ko kirisopaas, sappoo e go'abiri ndin ko hiyasinta, sappoo e didabiri ndin ko ametiise. ²¹ Tawi dame ñen sappoo e didi fow ko moyyiniraadé

^t **21:16** 21.16 Dun no hawra wa kilomeeterji 2200.

kode hittude, damal kala moyyiniraa hodere wootere. Tawi ballajal ngal ka saare ko ngal kanjne laabirdo wa biini jalgudo.

²² Laatii mi yi'aali *rewirdu e mayre, kono tawi ko Alla Joomiraado Jom Bawgal on e *Baalun kun woni rewirdu mayre ndun. ²³ Tawi saare nden hatonjinaa e naange maa lewru ko jalbinana nde, ko fii annoora Alla on no hentini nde, awa kadi Baalun kun ko ndaygu mayre. ²⁴ Ko jalbeendi mayre on leyyi din yaarata, awa kadi lambe aduna ben addanay nde darjaaji mun din. ²⁵ Dame mayre den ombetaake e nder nallal ngal few, bay d'on kapun jemmataa. ²⁶ Awa kadi nde addanoyte darja e teddungal leyyi din. ²⁷ Hay fus e ko tuuni e hay gooto wadwoowo ko jiddi maa fenaande naatataa don. Ko naatataa d'on woo ko be inde mun windii ben ka nder deftere ngurndan Baalun kun.

22

Fii Maayo Ndiyan Ngurndan dan

¹ Ontuma malaa'ikaajo on hollimmi kadi maayo ndiyan ngurndan dan ka iwrata ka jullere laamu Alla e *Baalun kun, laabudan jalgiri wa jaaman, ² no ila ka hakkunde ballajal saare nden. Leggal ngurndan dan no darii e cende dfidi maayo ngon, rimoowal biibbe laabi sappoo e dfidi, tetteteebe lewru bee, ngal leyyi din nawndorta haako mun. ³ Haray kuddi alaa hande kadi. Jullere laamu Alla nden e Baalun kun wonoyay e nden saare. Onsay jiyaabe makko ben kurkanto mo, ⁴ be yi'a yeeso makko

ngon, innde makko nden wona ka tiide mabbe.
⁵ Hara jemmataa han kadi, be hatonjintaa e
 ndaygu lampu maa jalbeendi naange, ko fii Alla
 Joomiraado on jalbinanay be. Awa be laamoyo
 kadi haa poomaa.

Fii Ardu Iisaa Sakkitordu ndun

⁶ O wi'immi: «Dii daaluyeeji ko holniidi e
 goongaaji. Joomiraado on, on Alla Jom ruuhuji
 annabaabe ben, imminii malaa'ikaajo mun on
 fii andingol jiyaabe makko ben fii kon ko saatii
 arude ko booyaa.»

⁷ Iisaa wi'i: «Mido ara ko booyaa! Haray
 maloore wonanii ben doftotoobe dii kongudi
 feñjinaadi wondi e ndee deftere.»

⁸ Ko min Yuuhanna nani fii dii piiji, mi yi'i di
 kadi. Nde mi nanunoo, mi yi'i di, mi jiccino e ley
 koyde on malaa'ikaajo holludo lan dii fii sujjangol
 mo. ⁹ Kono o wi'immi: «Wota wadu cfun!
 Min kadi ko mi kurkodoowo e maa, kurkoda e
 musibbe maa annabaabe ben, e ben doftotoobe
 dii kongudi wondi e ndee deftere. Sujjan Alla!»
¹⁰ O wi'immi kadi: «Wota ombu notaa ndee
 deftere nde dii kongudi feñjinaadi wondi e
 mun, ko fii saa'i on ko badiido. ¹¹ Awa kadi be
 feewaa ben yo duumo e jokkugol angal peewal
 mun, be laabaa ben kadi duumoo e jokkugol an-
 gal laabal mun, feewube ben duumoo e peewal
 mun, laabube ben duumoo e laabal mun!»

¹² Iisaa wi'i: «Mido ara ko booyaa, mi arda e
 njoddi mo kala embere kuude mun. ¹³ Awa kadi
 ko min woni Halfeere aranere nden e sakkitorde
 nden, ko min woni Arano on e Sakkitoro on, ko
 min woni Fudsdoode nden e Rawnoode nden.»

14 «Maloore wonanii ñen labbinbe conci mun fii hebugol gebal ka leggal ngurndan, e no ñe naatira ka saare, hara ko ka dambude ñe rewi.

15 Kono dawaadi din e mbileebe ñen e jinoobe ñen e ittoobe ko'e ñen e rewoobe sanamu ñen e kala on yifudo fenaande huutori yo wonu ka yaasi.

16 «Min Iisaa mi imminii malaa'ikaajo an on fii seeditanagol on dñi piiji ka mofte. Min ngol Dadol e Geeyol Daawuuda, awa kadi ko min woni Jaawiire Jalboore Subaka nden.»

17 Ruuhu Allaahu on e jombajjo on wi'ii:
«Aree!»

Awa, on nanudo dñun kadi yo wi'u: «Aree!»

Awa mo no dñondaa yo aru, on faalaado yo yettu ndiyan ngurndan dñan, hara yobaali. u

18 Awa mi fellintinanii kala on nanudo dñi kongudi fejjninaadi wondi e ndee deftere, si beyditii godðun e majji, Alla beyditay e hoore makko dñi albalauuji dñi fii mun windii e ndee deftere. **19** Awa kadi, si godðso aru ittude godðun e dñi kongudi ndee deftere fejjinannde, Alla kadi ittay gebal makko wongal ngal ka leggal ngurndan e ka saare hormorde, ñe fii mun windii e ndee deftere.

20 On Seediido dñun fow wi'i: «Ko goonga, mido ara ko booyaa.»

Aamiina!

Aree, yo Joomi amen Iisaa!

21 Yo moyyere Iisaa Joomi on wonu e hoore fow.

**Version Pular Fuuta-Jallon
The New Testament in the Fouta-Jallon Pular
language of Guinea**

copyright © 2010 Pioneer Bible Translators

Language: Pular

Translation by: Traducteurs Pionniers de la Bible

Contributor: Pioneer Bible Translators

This translation, published by Pioneer Bible Translators, was published in 2011.

If you are interested in obtaining a printed copy, please contact wab.admin@pbt.org.

The translation was completed in collaboration with Christian Reformed World Mission.

This translation is made available to you under the terms of the Creative Commons Attribution-No Derivatives license 4.0.

You may share and redistribute this Bible translation or extracts from it in any format, provided that:

 You include the above copyright and source information.

 You do not make any derivative works that change any of the actual words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2018-02-06

PDF generated using Haiola and XeLaTeX on 11 Nov 2022 from source files dated 29 Jan 2022

024b8126-79ef-5039-bc54-7d61889f8ae6